

Канон преподобному

Нилу Сорскому

Память празднуем 7 (20) мая

Тропарь, глас 4-й

Удали́вся, бе́гая, дави́дски, ми́ра, и вся, я́же в нем, я́ко уме́ты, вмени́в, и, в ме́сте безмо́лвие всели́вся, духо́вныя ра́дости испо́лнился еси́, о́тче наш Ни́ле, и, Еди́ному Бо́гу изво́лив служи́ти, процвёл еси́, я́ко фи́никс, и, я́ко лоза́ благопло́дна, умно́жил еси́ ча́да пусты́ни. Тем благодарственнo вопи́ем: сла́ва Укре́льшему ты в по́двиге пустынножи́тельства; сла́ва Избра́вшему ты в Росси́и отше́льником уставополо́жника изря́дна; сла́ва моли́твами твои́ми и нас Спасáющему.

Ин Тропарь, глас 1-й

Мирска́го жити́я отве́ргся и мяте́жа житейска́го бе́гая, преподо́бне и Богоно́сне о́тче наш Ни́ле, не облени́лся еси́ собра́ти цветы́ райския́ от писани́й оте́ческих и, в пусты́ню всели́вся, процвёл еси́, я́ко крин се́льный, отню́ду же прешёл еси́ и в Небе́сныя оби́тели; научи́ и нас, че́стно почита́ющих тя, твои́м ца́рским путе́м шество́вати и моли́ся о душа́х на́ших.

КАНОН, глас 4-й

Песнь 1

Ирмос: Отве́рзу уста́ моя́, и напо́лнятся Ду́ха, и сло́во отры́гну Цари́це Ма́тери, и явлю́ся, све́тло торжеству́я, и воспою́, ра́дуясь, То́я чудеса́.

Припев: Преподо́бне о́тче наш Ни́ле, моли́ Бо́га о нас.

Грехо́вною тьмо́ю покрыва́емь, не могу́ я́сно зре́ти к высоте́ исправле́ний твои́х, о́тче, но ты, я́ко сострада́телен и ми́лостив, помози́ ми, возсия́вая спаси́тельный в ду́ши мое́й свет, да пою́, ра́дуясь, све́тлая тво́я исправле́ния и пресла́вная чудеса́.

Преподо́бне о́тче наш Ни́ле, моли́ Бо́га о нас.

Мы́сленный рай показáлся еси́, о́тче, произраца́я разли́чных добродете́лей цветы́, плоды́ кра́сны своему́ Влады́це прине́сл еси́, украси́вшему ты чудеса́.

Преподо́бне о́тче наш Ни́ле, моли́ Бо́га о нас.

Еди́ну преступи́в за́поведь, перво́зданный из ра́я изгна́н бысть; ты же, преподо́бне, за́поведей Влады́чних соблюде́нием насле́дник сего́ показáлся еси́, дре́ва животно́го наслажда́ясь при́сно и, в весе́лии чи́стаго се́рдца твоего́ зря́ Го́спода, Божество́ннаго све́та Егó причаща́ешься.

Слава: Неукло́нно шеству́я по стопа́м за́поведей, жезл си́лы, Крест Христо́в в рукахъ держа́, в пристани́ще безстра́стия дости́гл еси́, о́тче, тем и благода́ть при́ял еси́ цели́ти неду́ги челове́ков и пресла́вная твори́ти чудеса́.

И ныне: Ны́не вре́мя по́мощи Твое́я, Влады́чице, при́зри ми́лостивно на озлобле́ние Твоего́ раба́, Чи́стая, подаю́щи утеше́ние мне, я́ко да и аз воспою́, ра́дуясь, Божество́нная Тво́я чудеса́.

Песнь 3

Ирмос: Тво́я песносло́вцы, Богоро́дице, Живы́й и Незави́стный Исто́чнице, лик себе́ совоку́пльшия, духо́вно утверди́, в Божество́нней Тво́ей сла́ве венце́в сла́вы сподо́би.

Преподо́бне о́тче наш Ни́ле, моли́ Бо́га о нас.

Не гордя́ся, дерзну́х песнь приноси́ти тво́ей свяще́нной па́мяти, о́тче, но любо́вию тво́ею дви́жим, Боголюбе́зне, приими́ у́бо си́ю от твоего́ раба́ и ко Го́споду ходата́йствы тво́ими спасе́ния сподо́би мя.

Преподо́бне о́тче наш Ни́ле, моли́ Бо́га о нас.

Любо́вию тя чту́щия, о́тче, спаса́й от бед и обстоя́ний, в честне́й тво́ей па́мяти лик себе́ совоку́пльшия, и коле́блемыя ны страсте́й бу́рею утверди́ тво́ими мо́льбами и во приста́нище спасе́ния дости́гнути сподо́би.

Преподо́бне о́тче наш Ни́ле, моли́ Бо́га о нас.

Кто изрече́т тво́я по́двиги, о́тче, и смире́ния твоего́ высоту́ кто ска́жет? Вои́стинну Христо́в учени́к был еси́, о Боголюбе́зне, и снасле́дник Того́ Ца́рствия. Помина́й у́бо чад тво́их, о́тче, моля́ся Христу́, да и нас ча́сти спаса́емых сподо́бит.

Слава: Неклю́чим аз есмь и всячески́ непотре́бен и недоуме́ю по досто́янию воспéти тво́я, я́же к Бо́гу, исправле́ния, но, о́тче благосе́рде, любо́вь и ве́ру приими́ и тво́ими свяще́нными ходата́йствы спасе́ния мя сподо́би.

И ны́не: Недоуме́ет вои́стинну всяк язы́к челове́ческий досто́йно славосло́вити Тя, о Влады́чице, по досто́янию; аз же, неве́жеством и грехи́ мно́гими одержи́м, что има́м принести́ Тебе́, Блага́я? о́баче любо́вь и ве́ру Твоего́ раба́ приими́ и спасе́ния сподо́би мя.

Господи, поми́луй (трижды).

Седален, глас 8-й

От дея́ния на высоту́ Божество́ннаго восте́кл еси́, о́тче, видéния и, молча́ние коне́чное облобыза́в, безмяте́жным умом́ Бо́гу присно́ бесе́довал еси́, сего́ ра́ди разумéнии Божество́нными отту́ду обогати́лся еси́, блаже́нне, и был еси́ па́стырь и наста́вник последую́щим равноа́нгельному жити́ю твоему́. Тем, Богоно́се о́тче наш Ни́ле, моли́ Христа́ Бо́га грехо́в оставле́ние дарова́ти пра́зднующим любо́вию святу́ю па́мять твою́.

Слава, и ны́не: В пучи́ну лю́те впа́в уны́ния от мно́жества грехопаде́ний мои́х, Чи́стая, приидо́х в недоуме́ние и отча́янием ны́не одержу́ся. Влады́чице Богоро́дице, Ты мя спаси́, Ты ми помози́, грешным́ бо Ты еси́ очище́ние, я́ко да и аз, со все́ми, получи́вшими Тобо́ю спасе́ние, веселя́ся, воспую́ непости́жное та́инство Рожде́ства Твоего́ и безме́рную Твою́ ми́лость.

Песнь 4

Ирмос: Седя́й в сла́ве на Престо́ле Божества́ во о́блаце ле́гце, прииде́ Иису́с Пребоже́ственный Нетле́нною дла́нию и спасе́ зову́щия: сла́ва, Христе́, си́ле Тво́ей.

Преподо́бне о́тче наш Ни́ле, моли́ Бо́га о нас.

Низве́ргл еси́ вся вра́жия, о́тче, ополче́ния, стоя́ бо́дренно на стра́жи внима́ния и изда́леча предзря́ сих кова́рныя се́ти, моли́твою́ же и постом́ безбе́дно прелета́я, победи́тельно пел еси́: сла́ва, Христе́, си́ле Тво́ей.

Преподобне отче наш Ниле, моли Бога о нас.

Всегда во уме имея страдания Спаса нашего и вольное на Кресте распятие, сраспаялся еси Тому умерщвлением плоти, преподобне, и, Того Божественною любовью уязвив твоё сердце, Боголюбёзне, показался еси умиления источник, слезоточа присно и поя: слава, Христе, благоутробному снизождению Твоему.

Преподобне отче наш Ниле, моли Бога о нас.

Христовою уязвлен любовью, слезныя токи непрестанно из очес изливал еси Ниле, отче наш приснопамятне, и в пустыни, яко в рай, водворяясь, непрестанныя приносил еси молитвы, поя присно: слава, Христе, силе Твоей.

Слава: Увы, коликим нечувствием содержим есмь, окаянный аз: ни смерти боюся, ни страшнаго судища трепещу, всякому злу повинен сый. Но, о душе всестрастная, понё отныне воспряни в покаянии, Христу зовущи: Твоего ради угодника Нила, пощади мя, Спасе, и исправи стопы моя, Владыко, всемогущею силою Твоею.

И ныне: Богородице Дево, христиан всех всенадёжное упование, спаси мя, отчаяннаго, о Мати Милосердая, оживи душею умершаго, Жизнь всех рождающая; Живоносный Источниче, напои мя умиления водами, зноём страстей люте опаляемаго, да покаяния слезами прохлаждаемь, благодарно воззову: слава, Владычице, всемогущей силе Твоей.

Песнь 5

Ирмос: Ужасошася всяческая о Божественней славе Твоей: Ты бо, Неискусобрачная Дево, имела еси во утробе над всеми Бога и родила еси Безлетнаго Сына, всем воспевающим Тя мир подавающая.

Преподобне отче наш Ниле, моли Бога о нас.

Отцев древних Святыя Горы житию подражая, Богоносе отче наш, Ниле приснопамятне, во отишие пустыннаго безмолвия потекл еси, радуясь, и, тамо во смирении плоды принося духа, по премногу благоугодил еси славою чудес Тя Обогатившему.

Преподобне отче наш Ниле, моли Бога о нас.

Господни заповеди исполняя, кроток и незлобив, отче, был еси, смирен и прост, и во всех добродетелех благоискусен, тем и Святаго Духа орган явился еси, премудре, научая и вразумляя чада твоя достойно ходити во след Христу, во смирении Тому служащим, спасение подающего.

Преподобне отче наш Ниле, моли Бога о нас.

Ныне, преподобне, приемля на Небесех почести трудов твоих, не забуди нас, твой праздник радостно празднующих, но испроси грехов разрешение, молящи Христа, прославльших Его славящим, спасение подающего.

Слава: Облеклся еси во Христа, Богомудре, безстрастия одеждою украсився, сострадательен и милостив, отче, был еси согрешающим, смиренномудро поучая и возбуждая к покаянию и ко Христу приводя, всем, во смирении просящим, спасение подающему.

И ныне: Одеждою студа облекохся окаянный аз, совлечён боготканная, юже во Крещении приях, одежды, о Дево Всенепорочная! Но молю Тя, Всемиловитая, во одежду мя спасения паки облеки, да достоин буду брака Агнца, Емуже от чистых кровей Твоих багряницу плоти исткала еси, всем, воспевающим Тя, спасение подающему.

Песнь 6

Ирмос: Божественное сие и всечестное совершающе празднество, Богомудрии, Богоматере, приидите, руками восплещим, от Нея рождшагося Бога славим.

Преподобне отче наш Ниле, моли Бога о нас.

С лики святых в Небесных ныне водворяяся селениях, о Ниле Богоносе, и со дерзновением предстоя Пресвятей Троице, нас, твоих чад, не забуди, отче, но испроси грехов разрешение твой праздник радостно празднующим, да благодарно ты прославльшаго Бога славим.

Преподобне отче наш Ниле, моли Бога о нас.

Новый благодетельный в Российской земли источник явился еси, Богоносе, струи исцелений изливая от святого твоего гроба верою несумненною притекающим к тебе, Ниле, отче наш, мы же, веселия исполняеми, ты прославляющаго Бога славим.

Преподобне отче наш Ниле, моли Бога о нас.

Усердно от юности твоя даже до честного преставления совестью чистою Христу послужил еси, преподобне, Того храня Божественныя заповеди, нестяжанием бо и ницетою себе оградив, на камени терпения твоя стопы, мудре, утвердил еси, Ниле, отче наш.

Слава: Многая твоя, о, отче, исправления и яже в Бозе труды и подвиги твоя, пощение и бдение, долгу легания и злострадания, ницету и совершенное нестяжание кто изрещи возможет? Воистинну бо истинен монах показался еси, Боголюбезне, тем и мы, любезно память твою чтуще, ты укрепльшаго Бога славим.

И ныне: Утроба Твоя, о Дево Пренепорочная, пространнейшая небес показася, вместившая Невместимаго Бога. О, преславных вещей! О, непостижимаго Ангелом и человеком, на Тебе совершившагося таинства! Тем Тя, Богородицу, воистинну исповедающе, от Тебе рождшагося Бога славим.

Господи, помилуй (трижды). Слава, и ныне:

Кондак, глас 8-й

Любве ради Христовы удалився мирских смущений, радостною душею вселился еси в пустыни, в нейже подвизався добре, яко Ангел, на земли, отче Ниле, пожил еси: бдением бо и постом тело свое изнурил еси вечныя ради жизни. Еяже ныне сподобився, во свете неизреченныя радости Пресвятей Троице со святыми предстоя, моли, молимгися, припадающе, чада твоя, сохранитися нам от всякаго навета и злых обстояний видимых и невидимых враг и спастися душам нашим.

Икос

Ангельскому поревновав житию и великим во отцех подобяся, всего себе отрешил еси мирскаго сплетения, к подвигам же постничества мужески вооружився, опасно путем Божиих заповедей шествовал еси, блаженне. Темже и мы, верно чтущии твою священную память, похвалами ублажаем тя сими: радуйся, ангельскаго жития подражателю; радуйся, древних великих отец житию преемниче. Радуйся, невидимых врагов мужественный победителю; радуйся, заповедей Божиих хранителю усердный. Радуйся, отеческих Богодухновенных преданий опасный ревнителю; радуйся, монашескаго постническаго жительства законоположителю. Радуйся, добродетелей чистейшее зеркало; радуйся, Духа Святаго сладкогласный орган. Радуйся, образе глубокаго смирения; радуйся, ревностный исполнитель Божественных дел.

Рáдуйся, я́ко тобо́ю научи́хомся непрелéстным путём жити́я ходи́ти; рáдуйся, я́ко твоим за ны ходáтайством спасéние получи́ти надéемся. Рáдуйся, Нíле чудотвóрче, óтче наш.

Песнь 7

Ирмос: Не послужи́ша твáри Богомúдри и па́че Созда́вшего, но, óгненное прещéние мúжески попрáвше, рáдовахуся, пою́ще: препéтый о́тцев и Господь и Бог, благословéн еси́.

Преподóбне óтче наш Нíле, моли́ Бóга о нас.

Песнь препрóсту усéрдно приношú ти, óтче: приими́ úбо сию́ от недостóйнаго и не возгнушáйся менé, па́че всех грешнéйшаго, о преблажéнне, но, мíлостивно преклóнься, спасéние улучи́ти твоим предстáтельством сподóби, да, рáдуясь, пою́: препéтый о́тцев Гóсподи и Бóже, благословéн еси́.

Преподóбне óтче наш Нíле, моли́ Бóга о нас.

Еди́н с Еди́ным Бóгом непрестáнно бесéдовал еси́, óтче, чíстыя моли́твы чíстым и немятэ́жным умóм Тому́ приносá и совестию чíстою, о Богомúдре, от дея́ния бо к видéнию востéк, весь боговиден соде́ялся еси́, блажéнне, присно поя́: препéтый о́тцев Гóсподи и Бóже, благословéн еси́.

Преподóбне óтче наш Нíле, моли́ Бóга о нас.

Плодонóсен сад показáлся еси́, óтче, принося́щ плоды́ дúха, любвé бо и рáдости преиспóлнен был еси́, мíра, долготерпéния, крóтости и воздержáния, и, я́ко Христовó воистинну, плоть распина́я со страстьми́ и похотьми́, и присно поя́: препéтый о́тцев Гóсподи и Бóже, благословéн еси́.

Слава: Не мúдростию, но любóвию тебе́ пою́щаго приими́, о óтче, и, светосия́нную твоёю моли́твою забвéния и невéдения тьму разгна́в, помози́ ми вопи́ти присно: препéтый о́тцев Гóсподи и Бóже, благословéн еси́.

И ныне: Под кров Твой, Влады́чице, прибега́ющаго не отрини, но, я́ко Всеми́лостивая, спаси́ убóгаго раба́ Твоего́, от безмёрных согрешéний моих избавля́ющи мя, да, рáдуясь, пою́: препéтаго о́тцев Гóспода и Бóга Мáти, во вéки благословéнна еси́.

Песнь 8

Ирмос: Отроки благочестíвыя в пещи́ Рождество́ Богородичо спасло́ есть; тогда́ úбо образуемое, ны́не же де́йствующее, вселéнную всю воздвизáет пéти Тебе́: Гóспода пойте, дела́, и превозноси́те Егó во вся вéки.

Преподóбне óтче наш Нíле, моли́ Бóга о нас.

Отче наш Нíле приснопа́мятне, краснó и добрó воистинну жити́е препроводи́л еси́, о Боголюбéзне: мирски́я бо молвы́ избежáв и в пусты́ню уединíвся, скóрби по́стныя сея́л еси́ со слезáми, но ны́не, рáдуясь, жнéши присноживóтия клáсы.

Преподóбне óтче наш Нíле, моли́ Бóга о нас.

Еди́ному та́йная вéдущему Бóгу вта́йне поработáл еси́, óтче, во смире́нии проходя́ добродéтелей по́прище, о блажéнне, по преставлéнии же твоём явлéн и свéтел еси́ чудесы́, пéти воздвизáя вёрныя: Гóспода пойте, дела́, и превозноси́те Егó во вся вéки.

Слава: Божéственною благодáтию, сýщею в тебе́, источáеши исцелéния и прогоня́еши дúхи лука́вствия от приходя́щих к тебе́ вёрно, Нíле всеблажéнне. Тем и мы любéзно чтим твою́ всесвящéнную па́мять, вéсело пою́ще: Гóспода пойте, дела́, и

превозносите Его во вся веки.

И ныне: Услыши, Владычице, болезненное воздыхание Твоего раба, разрешивши вериги моих согрешений, печаль на радость предложи и болезни прений вскоре, да, радуясь, пою Тя, Дево, и превозношу, Чистая, во вся веки.

Песнь 9

Ирмос: Всяк земнородный да възграется, Духом просвещаемь, да торжествует же Безплотных умов естество, почитающее священное торжество Богоматере, и да вопиет: радуйся, Всеблаженная Богородице, Чистая Приснодево.

Преподобне отче наш Ниле, моли Бога о нас.

Пресветел светильник отечеству твоему явился еси, преподобне, осиявая светлостью твоею жительства наша и чудес сияньми, имиже по преставлении твоём прославился еси, о блаженне. Тем, твою светоносную память чтуще, Христа славим, светло ты прославляющего.

Преподобне отче наш Ниле, моли Бога о нас.

Егда краснии твои нозе, добре по спасении пути текшия, на одре смертном простерл еси, блаженне, тогда ученицы твои, слезы точаще, глаголаху: како отходиши, пастырю наш, и кому оставляеши чада твоя, отче, ихже духовне породив, воспитал еси млеко́м твоего мудраго наставления?

Преподобне отче наш Ниле, моли Бога о нас.

Плачем моея радости не растворяйте, о чада, – ты рекл еси им, о Богоблаженне, – аз бо, веселяся отхожду прияти венец правды, егоже обеща Христос Того любящим, идеже и вы потщитесь постигнути, соблюдше Того, вкупе и моя заповеди.

Преподобне отче наш Ниле, моли Бога о нас.

Да восплачет вкупе с ними пустыня сия, о отче, аще бо и процветет, яко крин, красующися богоугодным жительством твоим, но не имея по тебе добраго делателя, терние и волчец иматъ возрастити. Обаче не остави посещати стадо твое, отче, и сам ты упаси тебе величающия.

Слава: Не забуди и ныне нас, обитающих на месте твоего трудоположнаго жительства, о Ниле Богоносе, отче наш, и песнь усердно тебе приносящим ходатайствуй спасение: ты бо, о всеблаженне, молитвенника и предстателя ко Господу стяжавше, надежды да не отщетимся, верно ты чтущии.

И ныне: Одеждою спасения одей мя, о всенадежное спасения моего упование, Мати Божия, на Тебе надеюся, Всемилостивая: сокровищница бо еси милости и вся спасаеши, к Тебе прибегающая. Спаси убо и мене, отчаяннаго, да благодарно пою: радуйся, Всеблаженная Богородице, Чистая Приснодево.